

07/08/2003

SK Keratong 10 perintis projek Komputer Nasional 2020

Sariha Mohd Ali

SEKOLAH Kebangsaan (SK) Keratong 10, dekat Muadzam Shah, Pahang menjadi sekolah rendah pertama di negara ini melaksanakan projek Komputer Nasional (Komnas) 2020, yang dilancarkan baru-baru ini.

Bagi sekolah menengah pula, projek perintis Komnas itu dilaksanakan di Sekolah Menengah Kebangsaan Simpang Bekoh, Asahan, Melaka.

Menteri Kewangan Kedua yang juga Ahli Parlimen Rompin, Datuk Dr Jamaluddin Jarjis, berkata pelaksanaan Komnas 2020 bertujuan merapatkan jurang digital, terutama di kalangan masyarakat luar bandar.

Berikutan itu, katanya, kerajaan menyediakan sumber kewangan mencukupi untuk membiayai projek itu.

Beliau berkata, projek Komnas di dua sekolah terbabit akan dinilai Kementerian Pendidikan dan hasilnya akan dikemukakan kepada kerajaan untuk menimbang cadangan memperluas pelaksanaannya ke seluruh negara.

"Selepas masalah pembangunan makmal komputer sekolah berjaya diatasi sepenuhnya, Kementerian Kewangan akan memberi tumpuan kepada isu pembekalan komputer dan penggunaannya supaya pelajar, terutama di luar bandar dapat menggunakan kemudahan itu.

"Bagi pelaksanaan Komnas, kerajaan menimbang untuk membekalkan komputer menggunakan perisian Linux yang kosnya lebih murah, selain komputer berasaskan perisian Microsoft," katanya.

Komnas 2020 adalah produk sulung DRB-Hicom Information Technologies Sdn Bhd (DHIT) yang menggunakan perisian Linux berasaskan sumber terbuka. Nama Komnas dipilih Perdana Menteri, Datuk Seri Dr Mahathir Mohamad yang melancarkan produk itu, 24 Julai tahun lalu.

Pada peringkat awal, sasaran Komnas 2020 adalah untuk pengguna di rumah tetapi DHIT memperluaskan aplikasinya untuk pasaran pendidikan menerusi makmal komputer sekolah.

Jamaluddin berkata, pengurusan sekolah juga perlu memberi pendedahan kepada ibu bapa berhubung pentingnya komputer supaya mereka dapat menyertai arus pembangunan negara menerusi teknologi maklumat dan komunikasi.

Berikutan itu, katanya, ketika cuti sekolah, guru diminta mengadakan kursus komputer kepada ibu bapa supaya mereka berminat dalam bidang itu.

"Saya sendiri akan menggunakan peruntukan Ahli Parlimen untuk membiayai kursus komputer kepada ibu bapa di kawasan Parlimen saya.

"Kita harap biarlah minat kepada komputer ini bermula di peringkat ibu bapa dan diturunkan kepada anak-anak," katanya.